

COMUNICATO n. 890 del 22/04/2024

Traduzione in cimbrio

Zivil Dienst 'z soinda 75 näüge prodjèkte vor 124 djunge

[Cimbrio] 'Z hefta å dar zboate von viarn turne vorgelekk vor haür zo zornira di djungen vor in universål provintziål zivil Dienst. 'Z mangse kandidàrn z'soina genump vor umman von 75 prodjèkte boda sojn khent augelekk djunge boda hãm zbisnen in 18 un in 29 djar nonet kompìrt, vor di 124 plètz bodada sojn. Aniagladar prodjèkt hatt soi skadéntz ma ma geat nèt spetar baz atz drai von madjo boda khint, anvétze alle di prodjèkte hevan å an sântzta in earst von prachant.

Vor di vizevorsitzaren vodar Provìntz un asesören vor di istrutzióng, kultùr un spòrt un politike vor di famildja vor di djungen un di glaiche oportunitét, machan in zivil Dienst bill sojn gemuant auzprovarnse in konkrètegen kontèkst, aunemmen näüge kompetentzan boda in an tage mang khemmen guat vor an arbat, krescharn azpe mentsch un khemmen sinnege pürgar. Di vizevorsitzaren vorst zo giana z'sega afte websait augelekk apòsta zo venna zbisnen alle di vorlegom da sèll boda pazzt daz peste vor daz sèll boma sait guat zo tüana: dar provintziål zivil Dienst iz vor di djungen an oportunitét innzotreta in di bèlt vodar arbat drinn in kontèkste un prodjèkte draugeschauget von provintziåln emtar boda schètzan di konkrètegen auzsicht boda di organizzaziongen mang opfarn. In da gelaichege zait dar zivil Dienst gitt zuar in djungen zo venna näüge sachandarn boden magatn pazzan un vorstian pezzar bazzen mage gian guat. Vor daz sèll di vizevorsitzaren schupft di djungen zo nemma disa okasiong.

Di plètz boma mage machah in zivil Dienst sojn a pizzle bobrall in di lentar vodar Provìntz. Di mearastn sojn ka Tria (39) un in Vallagarina (21) ma 'z soindara o atz Ala, in di Burge, a Cles, Pèrsan, Piana Rotaliana, Valle dei laghi un no åndre lentar o. 'Z soinda 67 prodjèkte boda innhaltu zbülf månat; 5 prodjèkte vo sèks månat; 3 prodjèkte vo drai månat.

Da sojn mearare di séktör boma mage sojn ågestèllt: umbèlt, animaziong, hilfe, komunikatziong un tèknolodjie, kultùr, edukatziong, spòrt un turismo. Vor aniaglan prodjèkt afte websait venntma a skèda pinn date bomase mak meldn, dar briav boda zoaget in prodjèkt saiz gantz saiz lai khurtz geschribet boda auroatet lai di bichtegarstn elementn von sèll boz bart sojn di arbat zo macha. Pezzar iz vorsan garade bia un baz in organizatziongen boda machan in prodjèkt boda hãm a mentsch gelekk apòsta zo rispundra aftz allz daz sèll boda iz zo mocha bizzan.

Ma bart mochan machan op un zua 30 urn afte boch, gezalt 600 euro aftu månat. Ma makse kandidàrn lai vor an uantzegen prodjèkt.

'Z Åmt vor in zivil Dienst vodar provìntz lekk au, vor di laüt boda sojn interesàrt, a drai trèff zo macha vorstian pezzar bazzez iz. Aniagladar trèff gitt di informatziongen boda sojn mångl zo maga zornìrn in prodjèkt boda gevallt mearar un bia zo macha in pruf z'soina inngenump. Ma bart ren von sèll boz iz dar zivil Dienst, bia 'z khinta gemacht a prodjèkt, bia ma mochten lesan, bia ma zornìrten, un baz 'z khinta

gevorst in sèlln bodase kandidarn zo machanen un no vil åndarst. Alle di trèff bartnse haltn online: zo venna di kredentziàln innzogiana iz genumma gian afte websait SCUP.

Di tang un di urn von trèff soinz dise da untar:

an menta 15 abrèl di zboa in tages

an fintzta 18 abrèl di noüne abas

an erta 23 abrèl di uleve vor mittartage

Zo bizzasan mearar übar in zivìl Dianst, zo bizza bazma hatt mångl zo nemma toal un zo haba a hånt innzoschraibase iz möglich vorsan in Amt vor in zivìl Dianst vodar Provìntz in bege Grazioli 1 ka Tria; email: uff.serviziocivile@provincia.tn.it; tel. 0461 493 100.

Djeneràl Info übar in zivìl Dianst: www.serviziocivile.provincia.tn.it/

Bia innzoschraibese aftn SCUP: <https://serviziocivile.provincia.tn.it/Adesione%23iscriviti>

Z' di prodjèkte auzgètt: [https://serviziocivile.provincia.tn.it/Progetti/\(filter\)/Progetti%2520SCUP_PAT](https://serviziocivile.provincia.tn.it/Progetti/(filter)/Progetti%2520SCUP_PAT)

'Z iz nützlich stian nå dar sait Facebook "WeSCUP il servizio civile trentino" un Instagram #SCUPTrento.

Übarsetzt von Schaltarle vor di zung von Toalkamou vodar Zimbar Hoachebene

(cdt)